

GUITS NE PXEEL PABL LO

ZHA ROMA

1 ¡Diuzh to grëse to!

Naa nac Pabl, naa nac tib ngundziin win quiayun naa xtsiin Jesús. Dios bredz naa pxeel me naa none naa Xtiidz Ndzon me lo miech.

²Padzeelale bnee Dios ne laa me cxeel Diidz Ndzon rii lo ne, lëew ga bzeet grë zha ne bиаad padzeela biadteed xtiidz me lo miech, lëew ga raquiet lo guits ne zhobnee Xtiidz me. ³Lëew ga rnee ganle cho nac Jesús (men ne brieequia lo xtii rey David ne laa me goc miech lo guidzliu; ⁴sangue Espíritu Sant, pxobnen me ganle Xpëed Dios nac me; min co gane brieegan me).

⁵Zeene bиаad Jesús, ga pxobnen me ganle tibaque noxco Dios ne; ni niina Diosaque bzooblo naa rxeel me naa none naa Xtiidz me lo grëse miech, zeena gliladz zho me, gon zho diidz gban zho zigne rnabey me. ⁶Zig nac to, glo lo guielcow ga ngab to; sangue niina laa me bredz to laa to ngab xnëz Jesús.

⁷Laa naa rxel guits rii lo to, grëse to ne no to guiedz Roma i. Golgacnan ganle rleyne Dios to, gane laa me bredz to ygab to lo me, gban to zigne no gban zha ne ngab lo me. Me ne nac me Pxoze ne, ni Jesús men ne rnabey, tibaque noxco me to, me nac men ne gacnien to zeena peet zhgab ctsebe to.

⁸⁻⁹Nanle to nasca ganle xtsiin Dios quiayun naa, dib zdoo naa quiaseed naa miech Diidz Ndzon ne nac zhiwseed Xpëed me.

Nu ne laa naa rsilo rne lo to, gloque rded naa xquizh lo Dios ni lo Jesús por mine quiayun to grëse to, sac gon tel pa lotaa zëeb diidz ne nlipaa dib zdoo to rliladz to me. Me zobwi, me nan ganle zeene rnabtaa naa lo me, ib riaanladzd naa to, tibaque rnab naa lo me gacnien me to; ¹⁰ni tibaque rnab naa telne zneedz me diidz gdzin tib dze ne grieelo guial naa i guialgan naa to. ¹¹Ne nlipaa rquiabladz naa ganlo naa to, guialzhaal naa gnedz naa rson lo to guien to zha ycaaniaraa to guielbiini ne rneedz Espíritu Sant; zeena tiblque gac guic to dziitsraa so to. ¹²Ni scagaa tipse gac ne ziodiidz ne zha nac Xtiidz Ndzon Dios, mine rliladz ne; zeena tipse gac ne sodziits ne low.

¹³Bets, bzian, tel gan to ganle blactaa vuelt ziyacladz naa guial naa i guialgan naa to, per haxta lo nadze gon rrieelodaque guial naa. Ib laa guic naa no guial naa lo to i, zeena gacndalraa miech ne sëeb gliladz Xtiidz Dios, zigne ziyacndal zho grëraa zaatne ziyateed naa. ¹⁴Sac ible naa raguial cseed

miech Xtiidz Dios, grëse zho niicle zha nona, niicle zha mbana; niicle zha raca, ni niicle grëgaa zha ne peet rienda. ¹⁵Minçocxe waa, tibaque laa naa racladz ye nêz qui guial naa guialne naa Xtiidz Ndzon Dios lo to, ne nac to zha ne no guiedz Roma i.

Poder ne rap Xtiidz Ndzon Dios

¹⁶Teļ naa, ib rtoładzd naa gne naa Diidz Ndzon rii lo miech, sac ncuaañ ro ne run Dios zeene rquiaadiag miecha. ¡Grëse miech ne gliladza, ib zlaa zho lo xtoļ zho! Laa guieļnzaac co no niina par grëse miech. Glose lo zha Israel bdziņa, laa niina laaw quiadziņ lo grëraa miech, zeena grëse zho gbig sëëb xnêz Dios. ¹⁷Sac gon, lëë Diidz Ndzon rii rlu zha rbiire rcaania Dios miech, rsañmbe me zho lo doļ rbiire riaanwen zho lo me: totsaque nli dib zdoo zho gliladz zho miņe nac Xtiidz me. Sca zhobnee lo Xtiidz me, zaatne rnee: “Zha ne biaanwenle lo Dios, ib zrieelo gbannie zho me, sacne dib zdoo zho rliladz zho miņe nac Xtiidz me.”

Xtoļ miech

¹⁸Ndionle ne ganle no guieļnë ro ne csiaab Dios ygaa grëse miech ntseeb, miech ne nêd gac-wen, ni desde gbaa cxeel me guieļnë ne ygaa zho; sac por xquieļntseeb zho rsaand zho gacnañ grëraa miech miņe nac diidzli.

¹⁹Grë zha ntseeb, nanle zho zha nac Dios, sac mezhal blu lo miech zha grieelo gunbey zho me. ²⁰Niicle ne grieelod ganlo ne Dios, per de lo grëtaa ncuaaņe bzaa me, grëtaa ncuaaņe run me, gase rlu ganle cho nac me. ¡Gase rlu ne nli me nac Dios, ni gdziņd dze ne lozh xpoder me!

Gacxe waa grë zha ntseeb, ib tedlaad zho lo guieļnë ne csiaab me ga; ²¹sac gon niicle nanpaa zho me nac Dios, ni ib rond zho xtiidz me. Nêd zho gunbey zho me zigne rieguiala, niicle xquizh nand zho gdeed zho lo me. Laa ne rzac zho na rien zho pe run zho, leļ pcow xquieļrien zho; rzac zho na lëew ga, gun zho ncuaaņe guiaabtaa guic zho. ²²Niicle ne rzac zho zha rien zha rac nac zho, per zha nac miech ne quialoozhraa lo xquieļnxe; ²³sac gon laa ne gunbey zho guieļndzon ne rap meņ ne nacpaa Dios nguiamban, leļ rsilo zho rzaa zho grë mdio ne niaa zigne rlu samiech guidzliu zho, grë mdio ne niaa zigne rlu grë ma ne rsiibe, grë ma ne rzë tap ni, grë ma ne rzëlen lo liu; leļ grë ncuaaņ co ziegan zho laa ne gleynie zho meņ ne nacpaa Dios.

²⁴Minçocxe nagon waa, rsaanladz Dios zho laa zho zienal grë ncuaaņe ndzinlid ne rzoobladztaa zho. Grë ncuaaņe ntoladzdox ne run zho, lëëque zha runnguzee zho rguitnie zho xcuerp zho. ²⁵Sac laa ne gleynie zho diidzli miņe rnabey Dios, leļ miņe rnee zha ne rquidie rleynie zho; leļ grë ncuaaņe bzaale Dios, ncuaaņe psanle me, ncuaaņ co ziegan zho, lo grë ncuaaņ co zieuqiitsgzhib zho; laa ne yquqiitsgzhib zho, gleynie zho meņ ne nac Dios mban, meņ ndzon ne psañ grëtaa ncuaaņe no. ¡Diosse rieguial gunnon miech, meņ co rieguial tibaque goolnie zho! Sca rieguiala.

²⁶Ne sca nagon nac zho, gane psaan Dios zho laa zho run grë guielyozh, ncuaane ngubeeguelto ne rieguialdraa gun miech. Grë wnaa laa ne gdeed zho diidz gnee tseel zho lo zho, lel lëëque sawnaa zho rquiangob zho, laa zho zienal grëraa guielyozh; ²⁷grëgaa mgui, laa ne gnee zho lo wnaa ne nac tseel zho zigne biaan no gaca, lel lëëque sabgui zho rzoobladz zho. Ncuaane mbixladz run zho, rquiangob zho lëëque sabgui zho; ni ne sca run zho grë ncuaan co, lëë mine rdziniaa zho nac grë guielguidz yozh ne riaan lad zho; ndzinlidraa rac zho.

²⁸Scataale nac zho, ni bii rzoliaadz zho gbig zho lo Dios, gane niicle megaa rlozh rsaanladz me zho, laa zho biaan lo grë zhgab yozh ne no guic zho, no zdoo zho, min co ne scataa nac zho. ²⁹Nroobdoo nac xtol zho, sac:

rsacsixuu zho samiech zho,
 rzoobladz zho ncuaane quianied zho,
 racntseeb zho lo samiech zho,
 në rac zdoo zho ran zho stib noded samiech zho,
 rut zho samiech zho,
 rtsidil zho samiech zho,
 rquidie zho samiech zho,
 rquiadiidzguizh zho samiech zho,
 miech yozh nac zho,

³⁰rneenë zho samiech zho,
 rquiabro zho lo samiech zho,
 racniats zho lo samiech zho,
 rlu zho ncuaane rapd zho, ncuaane nacd zho;
 rlëënie zho Dios,
 rio zho rbeebey zho grë guielntseeb,
 rond zho xtiidz pxoz zho,
 rond zho xtiidz xniaa zho,

³¹racladzd zho gon zho diidz,
 rund zho mine rnee zho,
 rleynied zho samiech zho,
 rund zho samiech zho perdon,
 rquiad zdoo zho samiech zho.

³²Niicle ne nanpaa zho zha rnabey Dios none gban miech, niicle ne nanpaa zho grëse zha ne run guielntseeb, ib tedsod znitlo zho; ni laa zho bii quiaayuna, ni haxta rley zho ran zho cho grëraa zha ne run grë mine run zho.

Xquielwxtis Dios

2 Ib tedsod no to gnë: “iZha ntseebtaa miech ne sca run!” iPer gni naa lo to ganle, zigtaa zhaw, zigtaa tow, lalga ntseeb to grë to! Sac ye to gon run grë guielntseeb co, gacxe waa, zha ne rzac rieguial zha co ygaa zho guielnë ne csiaab Dios, ye zho rieguial min co. ²Ndion ne ganle Diossi zeene laa me gun guielwxtis, grëse zha ne sca zienal guielntseeb, ib tedsod zunquizh me zhow.

³Zha ne sca rlozhd gzee zdoo pe quiayun̄ stib zho, haxta rlisqui zho min̄e quiayun̄ zha co, ni yeque zho quiayuna; masaque nan̄ zho nagon̄ zdedlaa zho zeene laa Dios guiaadgun̄ xquiel̄wxtis me, masaque nan̄ zho zha cose nitlo, laa zho tedlaa. ⁴None guien̄ zho gan̄le pa lotaa nquialadz Dios zho, pa lotaa noyap me zho paciens noxecw me grētaa ncuane run̄ zho; sac laa me quiambēz csaan zho xquiel̄ntseeb zho, yguudz zdoo zho gban zho zigne rnabey me. ⁵Tēlne tibaque squi ndip gac zdoo zho, gond zho min̄e rnabey me; gacnan̄ zho gan̄le, quiayun̄loraa zho grē guiel̄nē dox ne yгаа zho gal̄ dze ne laa me gun̄ guiel̄wxtis. Ni xquiel̄wxtissi me, zigne rieguāl gaca sca gun̄ mew.

⁶Gal̄ dze co, laa me gdeed min̄e rieguāl yгаа tib tib miech tel̄ zha wban zho. ⁷Grēse zha ne güeynal̄ beennon zho lē me, pxobnen̄ zho xquiel̄ndzon me, güeynal̄d zho grē ncuane rnitlo, lo zha co gdeed me tib guiel̄mban ne gdzind̄ dze lozh. ⁸Sangue grē zha ne güeynal̄ loxaque grē zhixco zho, güeynal̄ zho grē guiel̄ntseeb, laa ne nienal̄ zho min̄e nac diidzli; zha co yгаа grēse zhian ne csaab me.

⁹Ga nagon̄, grēse zha ne run̄ guiel̄ntseeb, zigtaa zha Israela, zigtagaa zha stib guiedza, ible zгаа zho tib guiel̄nē dox; ¹⁰sangue grē zha ne rban zaacse, zigtaa zha Israela, zigtagaa zha stib guiedza, ible zгаа zho lo xquiel̄ndzon me, zunnon me zho. Ni led yedraa ga pe zhgab ctseb zho.

¹¹⁻¹⁵Grēse zha ne gun̄ctal xtol̄, tel̄ chotaa nac zho zun̄quizh Dios zhow; sac tel̄ me, led yed me cue. Zig nac grē zha ne been̄beyd xley me, zun̄quizh me zho grē xtol̄ zho; sac niicle ne gocnand̄paa zho zha naca, per len̄ zdoo zho, guic zho, nan̄paa zho pa min̄ nac guiel̄ntseeb, pa mingaa nac guiel̄wen. Rrieequiacxe waa run̄beyle zho xley Dios ga. Scaquegaa zha Israela, ne nac zho zha ne run̄beypaa xley Dios, zun̄quizhaque me zho grē xtol̄ zho; sac niicle ne run̄beypaa zho xley me, per tel̄ lozh ga mband zhow. Nan̄paa zho pa min̄ wen, ni tel̄ lozh ga rond zho diidz gun̄ zhow; sac gon̄, led-xe por ne gacnand̄se ne ley waa laa Dios ycaaniale ne, sinque none gban new.

¹⁶Zdzin̄ tib dze, zeene laa Dios cxeel̄ Jesús, gun̄quizh me miech grēse dol̄ ne been̄ zho tib tib zho, niicle min̄e mazdraa rzac zho ngeuets zhlian̄ been̄ zho; sac sca rnabey Dios gaca, ni min̄ co noseed naa miech.

Zha Israel ni xley Moisés

¹⁷To ne nac to zha Israel, rzac to zienal̄paa to xley Moisés, niats rac to, rzac to tose non lo Dios. ¹⁸Nan̄wen to zha racladz Dios gban to, nan̄paa to pa min̄ wen sac pseed to xley me. ¹⁹Min̄ co masaque rzac to to cseed zha ne no lo ncow, grē zha ngoopdol̄. ²⁰Masaque rzac to to rien̄raa zha cseed to grē zha ne peet gacd, to rien̄raa zha quixbiini to grē zha ne peet riend̄; sac rzac to ne nan̄ to ley, tose nac zha ne ndziibraa nixbiini, tose nan̄ min̄e nacpaa diidzli.

²¹Nana, tel̄ scataa rien̄ to zha cseed to stib miech, ¿pe nac dzigo rwide to min̄e run̄ to?

Conque to name rnee lo miech cuand zho, ni rlozh ga toque quiaban. ²²Rseed to miech rnee to, tib zha ne nole tsiel̄, nodne yquiangob zho stib zha ne led

tsieeld zho; ni rlozh ga toque noyūn miñ co. Rnee to, rdziguiende to grē mdio, ni rio to rieban to yadoo ne zob grē mdio co.

²³Rlozhd gacniats to rzac to quiayunnon to lē Dios ne nan to ley, ni nande to gon, lel quiaguinitie to lē me ga, sac mbande to zigne nac ley. ²⁴Mine noyūnpaa to i ga gon raquiet lo Xtiidz Dios, zaatne rnee: “Por xtol to, grē zha zit laa zho rneenē Dios.”

²⁵Tel to, rzac to porne nacse to zha Israel non to lo Dios, per ne squi mbande to zigne nac xley me, nacaque to zigne nac grē zha zit ne runbeyda. ²⁶Nana, zha zit ne rioxco rban zigne nac xley me, ¿niacxe rieguald dzigo guiannziuu zho lo Dios? Sanziuu me zho gon. ²⁷Golgacnan sca ganle, glole zha zit co gon guiannziuu lo Dios, lēdle to ne nānpaa to zha racladz Dios gban to, nānpaa to mine psan Dios diidz ygaa to, ni rbande to zigne rnabey me.

²⁸Golgacnan sca ganle, led porne nacdse to zhin zha Israel, porne bio to xbey zho, laa to nziuu lo Dios. ²⁹Led scada gon, sinque zha ne nli dib zdo rioxco mine rnabey Dios, zha co nziuu lo me. Sac tel Dios, rwidaxe me waa dien cho pe bey ne no, sinque laa me rcaania zha ne nlipaa dib zdo, dib guic, rban zigne racladz me. Grēse zha ne znu nac, nziuu zho lo Dios, niicle telne rzac to peet nond zho.

3 Nana, ¿pa lugar nadien ne riaannon zha Israel lo grēraa zha stib guiedz? ¿Pa rquin ne scataa rio zho bey? Zootle lēē lalaquew tel niaca mine niacd zho zha Israel. ²Per led scada, no pe nacne non zho. Sac gon, ible lo zho psan Dios xtiidz me mazd padzeela.

³Nli ndal zho rond xtiidz me, per led mincod ctsēē me xtiidz me, mine bneele me lo zho. ⁴Niicxe tel zharaa quiayunctal miech xtol zho, sangue Dios ctsēēd me xtiidz me. Zigne zhubneeque lo Xtiidz me, zaatne rnee: “Mine rnee Dios, diidzli naca; niicle zha ne gacladz, guiend pe ncuane glisqui zho lo me.”

⁵Sca nac Dios, gacxe waa rnee me grēse zha ne runctal xtol, riegual ygaa zho guielnē ne cxeel me. Ga nagon, rlu ne mine nac diidzli, miñ co run me. Nana, ¿pe ziab ne nonguield mine run me ga? ⁶Mine nonguiel ga gon run me, sac tel gdziguien me grē zha ne runctal xtol, ¿zha naczhe guielwxtis ne dzigo gun me?

⁷Nana, nogaa zho gnē, ¿per pe nacne glisqui Dios dol ne rdziuu ne, ni tel por lēēw rlu ne diidzli nac mine run me? ⁸Per telne sca naca, rriequia dzigo ib none gunctal ne xtol ne parne yquiaraa zdo me ne. Ni nzian zha ne nobee xquielto naa, rnee zho ib miñ co noseed naa miech. Ni zha ne sca rnee, ib tedlaad zho lo guielnē dox ne riegual zho.

Grēse miech, ngoopdol nac zho

⁹Nana, ¿pe zdieets ne dzigo ne nac ne zha Israel, nziuura ne lo grēraa miech stib guiedz? ¡Led scada gon! Niina blozh bzeet naa lo to, grēse ne ngoopdol nac ne, zigtaa zha Israela, zigtagaa zha stib guiedza. ¹⁰Zigne zhubneeque lo Xtiidz Dios, zaatne rnee:

¡Guiend miech ne zienalpaa mine racladz Dios!

- ¡Ni tib zho guiend!
- ¹¹ Guiend zha ne niini guic;
guiend zha ne tsoxco yguib xnëz Dios.
- ¹² Grëse zho laa zho zie nëz ne nitlo zho;
niapse guielntseeb zianał zho.
¡Guiend zha ne zianał mine racladz Dios!
¡Ni tib zho guiend!
- ¹³ Ro zhow,
masaque been cuent naca zig nac len grë baa ne noyodz ngutoo;
niapse diidz ne rquidie zho zhoob lo ludz zho.
Grë diidz ne rnee zho,
masaque naca zig nac xvenen grë meel dox;
- ¹⁴ niapse grë diidz dox, niapse grë diidznë rrieche ro zho.
- ¹⁵ Ni zhow,
masaque zombëzlew dien pa tsiegot zho samiech zho;
- ¹⁶ loxaque guielnë, loxaque guielzi rsan zho zaatne rded zho.
- ¹⁷ Ib nand zho ne zaacse gbannie zho samiech zho;
- ¹⁸ per ni Dios rdziebdraa zho.
- ¹⁹ Gacxe waa nroob nac guielnë dox ne ygaa grë zha ne runbey ley ni mband zho zigne naca, leł run zho grëtaa guielntseeb zig nac grë mine goquiet nu. Ni niicle grëraa miech ne runbeyd ley, scaque ngoopdol nac zho, ni ro zho guiend pe guiab zho lo Dios. ²⁰ Golgan sca ganle, grieelod guiaanmbe ne lo Dios, niicle paraa yquia ne gun ne mine rnee ley; sinque par guien ne ganle ne ngoopdol nac ne, gane biaan ley.

Silaa Dios miech zeene gnalo zho me

²¹ Sangue niina, tib ladle biaan ley, laa Dios bneedz stib mod ne guiaanwen ne lo me. Ni lo grëque guits ne ziaad ley, lo grë guits ne pquiaa zha ne biadteed Xtiaz Dios padzeela, ga raqueta. ²² Grëse miech tel chotaa nac zho, tel petaa been zho, ib ziaanwen zho lo Dios totsaque dib zdoo zho gnalo zho Jesús, dib zdoo zho gliladz zho me. Zha ne gliladztaa me, sac led yed Dios rbe.

²³ Zigne rne naa ga, grëse ne miech ngoopdol nac ne lo Dios, ni palal rdzieeld gdzin ne lo xquielndzon me. ²⁴ Per niina laa me blu ganle pa lotaa noxco me ne, gola zdoo me pxeel me Jesús bdiizh grëse xtol ne, laa ne biaanwen lo me. ²⁵ Laa me been min co parne glu run me guielwxtis, sac niicle bdizhd ne xtol ne, per pxeel me tib men ne bzhiee xchen bdiizha xcuent ne, lëe men co nac Jesús; gane niina grëse zha ne gnalo men co, zun me zho perdon grëtaa dol ne pxew me been zho. ²⁶ Ni tib dol rapd me, ni scaque grë zha ne dib zdoo gnalo Jesús, sanmbe me zho lo xtol zho.

²⁷ Sca nagon psilaa Dios ne lo dol. ¿Cho nadien gacniats ga? Ni tib choot gacd gacniats, sac led por mine bdziuund new, sinque por grëtaa mine bded Jesús. ²⁸ Gocndion ne sca ganle: Niapse por dib zdoo miech gliladz zho Jesús, laa Dios ycaania zho; nacda por tso zho gun zho mine rnabey ley.

²⁹Nana, ¿pe zha Israelse sca ycaania me? ¡Lèda gon! Grèse miech, sca ycaania me zho. ³⁰Sac gon tibeyse ran Dios ne grèse ne; zigtaa zha Israela, zigtagaa zha stib guiedza, sanmbe me ne lo grè xtol ne, totsaque dib zdoe ne gnalo ne Jesús.

³¹Nana, ne znu rcaania Dios ne, no zho sac rquiindraa ley. ¿Zha yquiind-zhew? Niinale ne znu dib zdoe ne riladz ne Jesús, rienraa ne pa rquiina.

Dib zdoe Abraham bnalo me Dios

4 Zig nac pxozgoldoo ne Abraham, ¿pe been me ne laa Dios pcaania me? ²¿Pe por guielwen ne been mew? ¡Lèda! Telne scaw, nrieelo niacniats me (niicle ne nèz lo Dios ni palal rieguaald niacniats me). ³Sac gon rnee lo Xtiidz Dios, ne dib zdoe me bliladz me Dios gane pcaania Dios me zig tib zha ne peet xtol.

⁴Zig nac tib zha ne run dziin, dimi ne razh zho ible rieguaal zhow, rate zhow ga. ⁵Sangue Dios zdoe me ral rcaania me miech, zha ne dib zdoe rnalo me, nacda por pe guielwen ne gun zho par guiab ne laa zho rieguaala. ⁶Ye rey David bzeet guielbley ro ne rgaa zha ne sca rcaania Dios, ⁷rèb David:

¡Wen zie zha ne run Dios perdon!

Niicle nroob guielntseeb ne been zho;

tel pe nactaa xtol zho, glisquidraa mew.

⁸¡Wen zie zho sac gunquizhdraa me zho grè xtol zho!

⁹Nana, ¿pe loxaque grè zha ne nose bey zrieelo yгаа guielbley co, te ye grè zha ne noda ye? Nacda por bey, laa ne blozh bzeet ganle niapse ne dib zdoe Abraham bnalo me Dios, min co ne pcaania Dios me zig tib zha ne peet xtol; ¹⁰sac gon gard pe bey ne tso me zeene pcaania Dios me. ¹¹Pcaaniale Dios me dzigora bio me bey. Lega laa me biose bey co, zeena glu ne laa Dios pcaaniale me porne dib zdoe me bnalo me Dios. Mincoxe waa, Abraham nac dad lo grèse zha ne nod bey, ni dib zdoe zho rnalo zho Dios; ni scagaa Dios, rcaania me zho zig tib zha ne peet xtol. ¹²Ni meque nac dad lo grè zha ne no bey ni dib zdoe zho rnalo zho Dios, zigne bnalo me Dios zeene gard tso me bey co.

Zha goc mine bnee Dios lo Abraham

¹³Psanle Dios diidz lo Abraham ne me guiaannie guidzliu, grè me zha ne greeequiaraa lo xti me; guiabd ne togo porne been me mine nac xley zha Israela, sinque ne dib zdoe me bnalo me Dios. ¹⁴Nana, tel niaca zha ne gunse mine nac ley, zha cose yгаа min co, rrieequia dzigo zhlèse ga bnalo Abraham Dios, niicle diidz ne psan Dios lo me ga, nondaquew. ¹⁵Sac nac ley gon, zha ne gunda zigne naca, laa Dios csiaabzi zho; laa zaatne guiendgaa ley, gacd guiab zho cho noguitsa.

¹⁶Ne scacxe waa nac ley, gane niina lèese mine no gun ne nac dib zdoe ne gnalo ne Dios par yгаа ne mine psanle me diidz ga. Grèse ne yгаа min co, per nacdraaw dien cho zienal ley, cho zienaldgaaw, sac mine nonraa, dib zdoe ne gnalo ne Dios zigne bnalo Abraham me. Mincoxe waa, rrieequia Abraham

nac pxoz ne grëse ne, ¹⁷zigne rëb Dios lo Abraham: “Laa naa bzo luu, luu gac dad lo nzian dii miech.” ¡Lëë Dios co nagon bliladz Abraham, me rbeeban grë mengut, ni niicle haxta grë ncuaañe guiend, saa mew!

¹⁸Ndaldox rëb Dios gac lo xtií Abraham, ni bliladz Abraham miñe rëb Dios ga. Niicle ne zootle led ncuaañe gacda, per me dib zdo me bliladz me ne zaca, ni scagaa bdziñ dze ne laaw goc. ¹⁹Tibaque bnalo me Dios, niicle ne lala ziele xtse me (zig tib gayoole iz me), ni lala tseele me Sar, nacd me wnaa ne gap mëéd. ²⁰Ib goc chopd guic me niab me bod nlid niac miñe bnee Dios ga, sinque dzigole dib zdooraa me bnalo me Dios; haxta rdeed me xquizh lo Dios, ²¹sac nanpaa me men nroob nac Dios zun me miñe psan me diidz ga. ²²Ne sca nagon dib zdo me rnalo me Dios, gane pcaania Dios me zig tib zha ne peet xtold.

²³Zhobnee lo Xtiidz Dios sca pcaania me Abraham, ni laaw zhobnee zeena gacndion ne ²⁴ye ne scaania me ne zig tib zha ne peet xtold, totsaque dib zdo ne gnalo ne Jesús, men ndzon ne rnabey ne; ²⁵men ne gut ga bdiizh me xtold ne, men ne brieeban ga, par glu me nli psanmbe me ne nëz lo Dios.

Jesús rsanmbe miech lo dol

5 Nasi laa ne nacle zig zha ne peet xtold, laa ne biaanwenle lo Dios porne dib zdo me rnalo ne Jesús, men ndzon ne rnabey ne. ²Sac por grëtaa miñe bded Jesús, laa ne bgaa guielnzaac rii nacie me ne, ni ib csaand ne me. Tib guielbley nrooba lo ne, sac ndionpaa ne ib zgaa ne lo guielndzon ne no me.

³Ni scaquegaa nagon none gley ne zeene pe guielnë ne nodzian ne; sac ndion ne ganle, ga cseed ne lëb ne dziits so ne lo miñe rililadz ne. ⁴Ni zeene sca dziits so ne, zlliladzraa ne dib zdo me; ni zeene dib zdo me rililadz ne, zacnanpaa ne ib zgaa ne miñe rililadz ne. ⁵Ni ndionpaa ne zgaa new, sac blu Dios rleynie me ne, pxeel me Espíritu Sant nacie ne.

⁶Lëëtaque zeene rdzieldraa miech zha gun zho par guiaanmbe zho lo dol, hor co laa Dios pxeel Jesús, biaad me gut me bdiizh me xtold ne nac ne miech ngoopdol.

⁷Ndion ne ganle, niicle tib miech ne peet xtolda, tib miech ne mazdraa wena, led lega grieequiad tib zha ne cueeladz xquielmban guet por zha. ⁸Sangue Dios gon, niicle ne miech ngoopdol nac ne, blu me ganle pa lotaa nquialadz me ne, pxeel me Xpëéd me Jesús, men co bleeladz xquielmban gut me xcuent ne.

⁹⁻¹⁰Gotsaa gwi ne ganle, zha nactaa guielnë ne bded Jesús psanmbe me ne lo xtold ne, psanwen me ne lo Dios; ni scaque nagon, ible me csilaa ne lo grëtaa guielnë dox ne csiaab Dios ygaa grë miech ntseeb. Ne nligaa, csaand me dzian ne guielnë co; sac gon, tel scataa miñe been me por ne zeene nac ne tib miech ngoopdol, zeene scataa ntseeb goc ne blëënie ne Dios, ¿pe lel na dzigo ne laa ne biaanwenle lo Dios, laa ne biaanle zig tib zha ne peet xtold? ¹¹Gacxe waa, niina ne psanwen Jesús ne lo Dios, none ine gley ne ne laa ne ngable lo Dios.

Zha nacne biaan dol

¹²Znu gon nacne laa dol biaan: por mine been Adán bind me xtiidz Dios, min co nac ne biana. Ni por lëw pquiaqui laa guielgut bianaque, blozh ga grëse miech laa zho ret, sac grëse zho, tsod zha ne gunctald xtol. ¹³Desde hor co biaan runctal miech xtol zho. Grëse miech ne bre lo guidzliu, desde Adán haxta len dze ne laa Moisés pcaania ley, beenctal zho xtol zho, niicle ne guiendpaa tib ley hor co nlu ne dola. ¹⁴Gacxe waa ye zho, grëse zho gut; niicle ne bdiitd zho merpaa xtiidz Dios zigne been Adán.

¹⁵Nli tib guielnë ga psan Adán, per niinagaa mazdraa nroob guielnzaac ne rneedz Dios lo ne. Por falt ne been Adán, biaan grëse ne ne nac ne miech laa ne no guet; per niina ne biaad stib men ne beend ni tib falt, por min co laa Dios rquia zdoo ne grëse ne, laa me rneedz tib guielmban ndzon lo ne; lë men co nac Jesús.

¹⁶Tibaque nac dol co been Adán, per grëse miech biabzi; sangue Jesús zeene laa me biaad, grëse ne ne nac ne miech psilaa me ne lo grëtaa xtol ne, psanwen me ne lo Dios. ¹⁷Dol ne beense Adán ga, min co pquiaqui grëse ne ne nac ne miech, laa ne biaan ladznia guielgut; sangue niina ne biaad Jesús, zrieelo yгаа ne tib guielmban ndzon. Guielmban ne ral zdoo Dios gdeed me lo grëse zha ne gbig lo me gun me zho perdon.

¹⁸Sca nagon naca, por falt ne been Adán ga, grëse ne ne nac ne miech laa ne biabzi, per zeene laa Jesús biaad, pquia zdoo me ne masaque me bdiizh grëse caxtigw ne riogua ne ga, laa me psanwen ne lo Dios parne grielo yгаа ne tib guielmban ndzon. ¹⁹Golgan ganle, porne bdiits Adán xtiidz Dios, grëse ne ne nac miech laa ne goc zha ngoopdol; per scagaa, por bzoob Jesús grëse xtiidz Dios, zha ne gacladztaa, zrieelo guiaanwen zho lo me.

²⁰Ible laa ley biaan, par glu ganle pa lotaa nac grë falt ne noyun miech lo Dios. Per niicle scataa nac grë dol co, per blu Dios ganle mazdraa rquia zdoo me miech. ²¹Masaque bnabey dol miech, pxeela zho nëz ne nitlo zho; sangue zeene laa Jesús biaad, psanwen me ne lo Dios, gane niina zha ne gnalotaa Jesús zгаа zho tib guielmban ndzon.

Zha ne mbanniele Jesús

6 Laa ne bdzianle ganle zha noxcotaa Dios ne. Nana, ¿pe zdieets ne dziuunctalraa ne xtol ne zeena tsoxcoraa me ne? ²¡Lëdraaw ga gon! Nodraa ne dziuun ne dol, sac gon, laa ne nacle niina zig tib zha ne gutle nëz lo dol.

³Golgan ganle, zeene laa ne bziaab xnëz Jesús ni brobnis ne, rriequia gut ne ga zigne gut me. ⁴Zeene brobnis ne rriequia bioliu ne ga, zigne bioliu Jesús. Ni zigne brieaban Jesús (por poder ndzon ne rap Dios), scaque ne rriequia brieaban ne, stible guielmban ne rdziaap ne.

⁵Ni zigne sca rriequia gut ne zeene gut Jesús, scaquegaa ndionpaa ne zbeeban me ne zigne brieaban me. ⁶Ndion ne ganle, miech ne goc ne glo zeene scataa bional ne guielntseeb, rriequia ye miech co pquianie me lo cruz. Ga bnitlo

mine goc ne ga, zeena ygadoodraa ne lo dol; ⁷sac gon, deque bnitlo grë mine goc ne glo, grieelodraa gnabey dol ne.

⁸Nana, telne scale gutnie ne Jesús, ndionpaa ne ib zbannie ne me.

⁹Ndion ne ganle brieeban Jesús, ni gdzindraa dze guet me. Grieelodraa pe gun guielgut me.

¹⁰Tibaque vuelt gut me bdiizh me xtol grëse miech, sangue niina mban me ni Dios mbannie me. ¹¹Scagaa to nasca, golguien ganle laa to gutle lo dol, nodraa gnabey dol to stib, sinque laa to mbanle niina par gun to mine rnabey Dios. Golguien ganle, Jesúsle nacie to.

¹²Nana sca, gdeetraa to diidz gnabey dol xcuerp ben to i, tso to gun to grë ncuaañe ndzinlid ne racladz xcuerp to. ¹³Ib gdeete to diidz guiab to lo dol stib, gun to grë guielntseeb; sinque golsan to lадznia Dios, ine golgun grë mine racladz me. Golguien ganle, laa to gutle lo grë dol, Diosle mbannie to niina; ¹⁴zeena scagaa gnabeydraa dol lo to, zigne beena to zeene scataa bioxco to mine rnabey ley. Sac gon rnabeydraa ley to niina, laa Dios blule ganle pa lotaa nquialadz me to biaadsilaa me to.

Nli nquialadz Dios ne, rnabeydraa ley ne. ¹⁵Per nana, ¿pe ne rnabeydraa ley ne, pe ne nquialadz Dios ne dzieets ne dziuun ne grëtaa ncuaañe gunctal xtol ne? ¡Lëda ga gon! ¹⁶Nanle to ganle, tib zha ne nanle cho lo yquia zho dziin, lo zha co ngadoo zho ni mine rnee zha co none gun zho. Zig nac zha ne ngadoo lo dol, niapse dol run zho ni mine tsieguiäl zho laa zho nitlo; sangue zha ne run mine rnabey Dios, scaania Dios zho zig tib zha ne peet xtold. ¹⁷Nli glo lo dol ngadoo to, per xquizh Dios zeene laa zho biadseed to Xtiidz me gocnan to zha laa to lo dol, laa to bliladza ni noxco to mban tow niina. ¹⁸Ni zeene laa to brieeladznia dol, laa to bgab lo Dios; zeena mine rnabeyle me mincole gun to. ¹⁹Znu bzet naa grë min rii lo to, zeena guien to zha naca.

Nana sca, zigne scataa bio to lадznia dol been to grëtaa guielyozh, grëtaa guielntseeb, scagaa niina golsan to lадznia Dios, golban zigne rnabey me, zeena lozh guiaanmbe to zigne racladz me. ²⁰Zeene scataa ngadoo to lo dol, ib wbande to zigne rnabey me.

²¹¿Pe nadien needz dol lo to? Lëë gdib mine ngaa to laa to nitlo. Zig nac niina, haxta rtoladz to zeene rsoladz to grë ncuaañe been to hor co. ²²Sangue niina, ne laa to brieeladznia dol laa to ngab lo Dios, ible ziaanmbe to zigne racladz me, ni zgaa to tib guielmban ne gdzind dze lozh.

²³Sac gon, zha ne runctal xtol, lëë gdib mine tsieguiäl zho laa zho nitlo; sangue zha ne gbig lo Jesús, mine ral zdoo Dios ygad me lo zho nac tib guielmban ne gdzindraa dze lozh.

7 Bets, bzian, to ne nac to zha ne runbey Xley Dios, nanwen to ganle, zeene zombanse miech dzigo rrieelo rnabey ley co zho.

²Zig nac tib mgui ne rtsieelnia, rnabey ley ne mguise gbannie wnaa ne nac tsiel mgui. Per tel gzoob ne glo mgui guet, dzigo gacdraa gnabey ley ne mguipaa gbannie wnaa co; telne gacladz zho ctsieelnia zho stib mgui, zaca. ³Nli nonguielda ga gun wnaa ctsieelnia zho stib mgui laga bii zomban

tseeł zho; laa zeene gutle tseeł zho, led dołdraaw yguib zho stib zha ne tseełnia zho.

⁴Bets, bzian, scadaa nagon bzhaac to. Zeene sca gut Jesús, rreequia ye to gut ga, gane niina ngadoodraa to lo ley, niicle lëegaaw grieelod gnabeya to. Jesús, men ne brieaban ga, mele nac tseeł cub to niina. Niinasi, zrieełole gban to zigne racladz Dios; ⁵sac glo (zeene scataa bdziunctal ne xtol ne, bdziun ne grëtaa ncuaaane nonguieldraa niicle ne ndionpaa ne pe nac mine zhobnee lo ley no dziun ne), niapse grë ncuaaane nxeel ne zaatne nitlo ne, ncuaan co bdziun ne. ⁶Blactaa bgadoo ne lo ley, sangue niina rreequia gutle ne nëz lo ley, laa ne mbanle zigne rnabey Espiritu Sant.

Rca doł gac mine rnabey ley

⁷Nana, ¿pe zdzieets ne dzigo por leypaa rdziunctal ne xtol ne? ¡Coo, led scada! Tel naa gon, ib niacnand naa pe nac doł telne guiend ley. Niacnand naa ne doł ga gzoobladz ne chen ben, telne niacnand naa ne rnee lo ley: “Gzoobladz luu chen ben.” ⁸Zeene gocnan naa zha nac ley, dzigoraan bien naa niapse doł nac mine noyun naa; sac zeene guiend ley, rlud pe nac doł.

⁹Glo zeene riend naa zhapaa nac ley, tibaque rzaac naa ib peet doł rapd naa; per zeene gocnan naa zha nac ley, bien naa ne ib raguial naa nitlo naa, sac doł quiayun naa. ¹⁰Nli laa ley biaan zeena guien ne zha grieeło ygaa ne guielmban, per lel bluw ne raguial naa nitlo naa sac ngoopdoł nac naa. ¹¹Ne nligaa bdziitnie doł naa, mine rsopaa ley diidz nod gun miech mincopaa ben naa; ni blozh ga, lëëque ley blu ne ib raguial naa nitlo naa. ¹²Niicle ne scaw, per Dios psana ni rquiin grë mine zhobnee low.

¹³Nana dzieets ne, conque telne wen nac ley, ¿zha nac dzigo ne lëëpaaw rlu ne riogual ne guet ne? ¡Coo, led scada! Sinque znu naca: doł pteedquie ne ladznia guielgut. Ga rlu ganle zha nactaa doł, sac gon lëëque ley pquiin doł pteedquiew ne lo guielgut. Ga blu ley ganle zha ntseebtaa nac doł. ¹⁴Gotsaa gwi ne ganle wen ley, led leyd rxin, sinque ne rxin; sacne rreequia ngadoo xuerp ne lo doł.

¹⁵Tel naa, riend naa pe nacne znu rac naa, niicle ne racladzpaa naa gun naa ncuaaane nonguiel per nëda, lel ncuaaane rzoobladz naa min co run naa. ¹⁶Grë ncuaaane run naa, now rienpaa naa nonguielda; haxta guic naa, zdo naa, rien naa wen ley, sinque naa quiaguits mine rnabeya. ¹⁷Nana, niicle ne rien naa scaw, per gacd pe gun naa, sac ngadoo xuerp naa lo doł, masaque doł rcheep naa run naa ncuaaane ndzinlid. ¹⁸Rien naa miech ngoopdoł nac naa, ni palal ncuaaane ndzinli gacd gun naa; niicle ne racladz naa gac-wen naa, per rrieełoda.

¹⁹Zeene racladz naa gun naa ncuaaane rquiin, per rrieełod gun naaw; laa zeene ni naa gundraa naa ncuaaane ndzinlid, lel mincole run naa. ²⁰Ni ne znu lel grë ncuaaane racladz naa, min co run naa, gase rlu ne led naadse quiayun grë ncuaan co; sinque doł quianabey xuerp naa run naaw.

²¹Rien naa niicle ne racladzpaa naa gun naa ncuaaane wen, per le_l guie_lntseeb run naa. ²²Zdoo naa, guic naa, rleynie naa Xley Dios, racladz naa gban naa zigne rnabey me; ²³per dzigo rtse do_l lo naa, rriee_lod gun naa ncuaaane nongui_l. Masaque do_l rnabey xcuerp naa, racladzda gun naa ncuaaane rnabey Dios; sac ngadoo xcuerp naa lo do_l.

²⁴¡Probsaxe naa, znutaa nac xcuerp ngoopdo_l naa nu! ¿Cho samiech ne dien grieelo csilaa naa low; sac ncuaaane gnitlo naa mi_n co mazdraa rdziladza?

²⁵¡Xquizh Dios pxeel me Jesús bиаadsilaa me ne lo do_l!

¡Jesús nac me_n ne psilaa naa!

(Znu nagon rzac naa: rien naa nongui_l gun naa mi_n nac Xley Dios, per xcuerp naa le_l laaw ziena_l mi_n rnabey do_l.)

None gban miech zigne racladz Espíritu Sant

8 Laa ne gocndion nasca gan_{le}, zha ne ngab lo Jesús ndziibdo_ldraa zho, ²sac zha ne ngab xn_{èz} me, laa Espíritu Sant psilaale zho lo do_l, laa me psilaale zho ladznia guie_lgut, laa me bdeedle tib guie_lmban cub lo zho.

³Waltaa ib brieelod ley nsilaaw ne lo do_l, gane mazd laa Dios pxeel Xp_{èèd} me bиаadsilaa ne. Brieelod ley, sac gr_{èse} miech laa ne tsiena_l zho mi_n rnabey ley, mazdraa ziena_l zho ncuaaane runctal xto_l zho. Gane zeene pxeel Dios Xp_{èèd} me, goc me miech (l_{èèraasi} ni tib do_l beend me), me_n co gut bdiizh gr_{èse} xto_l ne, dzigo ga laa me psilaa ne ladznia do_l.

⁴Gacxe waa, niinasi zrieelo dziuun ne gr_è mi_n rnabey ley, per none gdeed ne diidz guiona_l ne mi_n rnabey Espíritu Sant, ni lalnu gdeete ne diidz gac mi_n racladz xcuerp ne nu.

⁵Gr_{èse} zha ne mban zigne racladz xcuerp ngoopdo_l zho, loxaque gr_è mi_n co rioxco zho; laa zha ne mban zigne racladz Espíritu Sant, mi_n rnabey Espíritu Sant rioxco zho.

⁶Zha ne sca rioxco loxaque mi_n racladz xcuerp ngoopdo_l zho, n_{èz} ne nitlo zho ga zie zho; san_{gue} zha ne rioxco mi_n racladz Espíritu Sant, laa zho zie n_{èz} ne yгаа zho tib guie_lmban; peet dzeb, peet zhgab ctsebdraa zho. ⁷Ni stiba, zha ne rioxco loxaque mi_n racladz xcuerp ngoopdo_l zho, rl_{èènie} zho Dios ga, sac n_{èd} zho gban zho zigne rnabey xley me; ni niicle gacladzгаа zho, grieelod zho. ⁸Min_{co}cxe waa, ib rzacd zdoo Dios gr_è ncuaaane run zho.

⁹San_{gue} to, mbandraa to zigne racladz xcuerp to, sinque laa to mban zigne racladz Espíritu Sant. Sca mban to, sac Espíritu Sant nacie to. Nan_{le} to gan_{le} zha ne nacie_d Espíritu Sant, nli_d xn_{èz} Jesús no zho. ¹⁰Ni to ne nac to zha ne nole xn_{èz} Jesús, ible zгаа to tib guie_lmban ndzon, sac laa Dios psilaale to lo do_l. Nli zig nac xcuerp to, ncuaaane nitlo naca, sac por do_l bиаan sca no gaca; san_{gue} zhiespírituw, nitloda. ¹¹Dios bleeban Jesús, ni scagaa tel_{ne} nli nacie to zhiEspíritu me, meque cueeban to.

¹²Bets, bzian, nodne dziuun ne ncuaaane racladz xcuerp ngoopdo_l ne, zig nac zeene pe nz_{èèb} ne low. ¹³Sac tel_{ne} gr_è ncuaaan co tsiena_l to, ible znitlo to; san_{gue} tel_{ne} gnab to gacni_n Espíritu Sant to csaan tow, dzigo ible zгаа

to tib guieľmban. ¹⁴Sac grëse zha ne zienal zigne racladz zhiEspíritu Dios, ga rlu ne nlipaa xpëed Dios nac zho.

¹⁵Goľguien ganle, laa Dios bneedz zhiEspíritu me lo to, sac xpëedle me nac to niina. Tsode to sca gdziebd to me, zig nac zeene cho tib ngundziin win nac to lo me. Xpëed me nac ne, gacxe waa zac tibliladz gnee ne lo me guiab ne: “¡Papá yeen!” ¹⁶Ni Espíritu coque runquien ne ne nli xpëed me nac ne.

¹⁷Nana ne laa ne nacle xpëed Dios, scagaa dzigo ye ne ible zgaa ne grëtaa ncuaane bdeed me lo Jesús.

Nli zgaa ne lo grë guieľndzon ne no Jesús ga, per scagaa none dzian ne grë guieľnë niina ne laa ne ngab lo me.

Guieľndzon ne naraa guiaad

¹⁸Guieľnë ne dzian ne lo guidzliu rii, loxaque ne ngab ne lo Jesús, led ncuaane rnad ga; mazdraa nroobdoo nac lo guieľndzon ne naraa dzian ne.

¹⁹Zig nac grëtaa ncuaane bzaa Dios, masaque quiambëznëw gdziñ dze zeene laa grë zha ne nac xpëed Dios ygaa lo guieľndzon co; ²⁰⁻²¹sac gon, gal dze co laa guidzliu guiaanmbe lo grëtaa ncuaan paat rquiind, lo grëtaa guieľntseeb ne no low niina. Dios bdeed diidz biaan grë ncuaan co low, per zeene gal dze co, zeene laa grë zha ne nac xpëed Dios laa lo grëtaa guieľntseeb, yew laaw laa.

²²Laga quiambëz grë ncuaan co gdziñ dze co, masaque mban raca, rzaca zig rzac tib men wnaa ne quiayal xpëed. ²³Ni ndion ne ganle, haxta ne, ne nac ne zha ne nacie Espíritu Sant (zeena glu ne ible zgaa ne grëtaa ncuaane gneedz me), mban rac ne quiambiaaz ne gdziñ dze co, zeene laa Dios ctsëe xcuerp rii ne ni ycaania me ne zig xpëedpaa me.

²⁴Ndion ne ible zbee Dios ne lo grëtaa ncuaane rac lo guidzliu rii, per nana laa ne quiambiaaz dzianpaa ne gaca. Tib ncuaane lëe ranle ne noyac, nod pe nacne yquiambëzraa new, ²⁵per zeene quiambëz ne tib ncuaane naraa gac, dzigo nodne guieed ne, sinque ine tiblifique gac ne yquiambëz new.

²⁶Ni scagaa zeene lëbdraa ne, riendraa ne zha gun ne, Espíritu Sant nac men ne gacnien ne. Zig nac zeene gzodiidznie ne Dios, tel nesew nand ne zhapaa nonguiel gnee ne lo Dios, dzigo Espíritu Sant runcnee ne grë diidz ne riend ne zha nac. ²⁷Ni Dios ne nac me men ne nappaa pe rza zdoo miech, rien me pe rnee Espíritu Sant, sac miñe racladz Dios gac min co rnab me.

Tsod ncuaane yquiaaqui csaanladz Jesús ne

²⁸Ndion ne ganle, zha ne nli dib zdoo rleynie Dios, zha ne rioxco gac grë miñe racladz me, grëse ncuaane rded zho, led lega rdete zhow, sinque no zaatne rquiina lo zho. ²⁹Ni ndion ne ganle, zha ne nanle me ygab xnëz me, desde mazd glow, pso me zho gac zho zig nac Xpëed me Jesús. Lo grë zha ne nac xpëed me, Jesús nac men nroob. ³⁰Ni grë zha co, laa me quiabedz zho, quiasilaa me zho lo dol, laa zho noyaanwen lo me; zeena ygaa zho lo guieľndzon ne no me.

³¹¡Zha nactaa ncuaane lëë run Dios! Nana, tel scataa racnie Dios ne, ¿cho nadien grielo lega pe gun ne? ³²Golgotsaa gwi ne ganle, haxta xpëed me bdeed me gut xcuent ne, grëse ne ne nac ne miech. Nana, ¿pe lel grë pe stib cos dzigo yquia zdoo me gneedz me lo ne?

³³Ible Dios bzooblo ne, gacxe waa, ¡choot rieguiald glisqui gnë lëda nodziun ne! Sac gon, Dioszhal psanmbe ne lo dol. ³⁴¡Choot rieguiald ycaadz dol ne! Sac gon laa Jesús gutle bdiizh me xtol ne; per brieaban me, ni na laa me zob cue Dios zaatne rieguial me nac me men non. Ga no me quianab me lo Dios por ne. ³⁵¡Tibaque rleyne Jesús ne! Zeene nodzian ne guielnë, zeene mban rac ne, zeene rtsidil miech ne, ib guiabd ne togo bod rleynied me ne. Niicle zeene guiendgaa pe gow ne, guiend pe gacwxab ne, o noxtseebgaa ne guet ne, ib guiabd ne togo psaanladz me ne. ¡Tibaque rleyne me ne! ³⁶Ni zig nac xcuent guielgut, laaw raquetaque lo Xtiidz Dios, zaatne rnee:

Grëse no ne nac no zha ne ngab lo luu,

tibaque noxtseeb no lo guielgut;

masaque rzac miech no zig rzac zho grë mëcwxiiil ne golle guet.

³⁷Niicxe peraa waa dieed ne, zdziun ne gan low ni palal csanwinda ne, sac Jesús nacnie ne; ni rleyniedox Jesús ne.

³⁸Nanween naa tsod ncuaane yquiaaqui csaanladz Dios ne:

per ni guielgut,

per ni guielmban,

per ni anjl,

per ni mendox,

per ni grë ncuaane noyac niina,

grëgaa ncuaane naraa gaca.

³⁹Niicle grë ncuaane no glaa zhan gbaaw,

niicle grë ncuaane no guietraa zhan guidzliuw,

niicle grëragaa ncuaane bzaa Dios.

¡Ni tiba ycada, sac tibaque rleyne Dios ne! Ni laaw blule me ganle, zeene pxeel me Jesús (men ne rnabey ne), men ne gut bdiizh grëse xtol ne.

Ible Dios bzooblo zha Israel

9 ¹⁻³Bets, bzian, ¡blactaa racladz naa guien grëraa zha Israel cho nac Jesús! Rquianë zdoo naa zho nac zho menladz naa, tibaque mban rac zdoo naa rsoladz naa zho. Haxta Jesús, haxta Espíritu Sant nan ganle rquiad zdoo naa naa niicle maase gdzibdee miech naa, maase nitlo naa guia naa zaatne gandraa naa Dios, telne niaca por min co laa zho guien zha gbig zho lo Dios.

⁴Blactaa quiyacnien Dios zho, ni rond zho xtiidz me. Bzooblo me zho gac zho zha ne ygab lo me, haxta bzënie me zho, gon zho ganle men ndzon nac me; biaan zho diidz grë zho me zha mod gunlay me zho. Psan me ley lo zho zeena guien zho zha gban zho, ni psan me diidz lo zho zha gleyne zho me. Nzian grë ncuaane bnee me gdeed me lo zho. ⁵Lëë pxozgoldoo zho ga goc Abraham, goc Isaac, goc Jacob, ni lo dii co ga brieequia zha ne bded zig

menlidz Jesús. Me nac Dios, me rnabey grëtaa ncuuañe no, ni me rieguiäl gacnon gzataa dze. Ible sca rieguiälä.

⁶Nana, no zho guiab gocdaque grë minë bnee Dios ga yгаа zha Israel. Per led scada. Sinque lëë min co rгаа zha ne nlipaa rnalö Dios, sac zha co nac zha ne nlipaa nac zha Israel. ⁷Nacda ne loxaque ziaad zho lo xtii Abraham, laa zho nacle merpaa zha Israel; sac gon, niicle ne nzian mëëd pquianie Abraham, per rëb Dios loxaque Isaac gac cuent zig xpëëd Abraham. ⁸Gase naganle rlu, zig nac niina, grë zha ne ziaad lo xtii Abraham, led grëd zho ngab lo Dios; sinque zha ne bzooblöle me zigne bzooblo me Isaac, zha co ngab lo me. ⁹Sac zig nac Isaac, ible Dios bnee lo Abraham grop Sar, ne laa Isaac gac mëëd lo zho.

¹⁰⁻¹¹Ni scasaque xpëëd Isaac. Bdziñ dze, zeene laa Isaac ptsieelnia wnaa ne lë Rebec, dzigo gop Rebec tibnëz mëëdbgüi. ¹²Bii zoney Rebec grop mëdyeen co, laa Dios bzooblöle win ne brielë Jacob rëb me, ne ible Jacob gac zha non lo Esaú, win ne glo gal. ¹³⁻¹⁵Laaw zhobneeque lo Xtiidz Dios, zaatne znu rëb me: “Ible Jacob bzooblo naa beenlay naa, bzoblod naa Esaú.” Gard gal grop mëëd co, per ni gard gacnan win zha nac guielntseeb, zha nacгаа guielwen, laa me bzooblöle tib win. Ga nagon, blu Dios ne mese nac men ne rieguiäl rzooblo tel cho zha ne ygab lo me, nacda por pe ncuuañe noyun zho.

Nana, ¿pe dzdieets ne guielntseeb ga sca run Dios? ¡Led guielntseebda! Tib vuelt rëb me lo Moisés: “Zha ne gacladz naa yquia zdoo naa, squia zdoo naa zho.” ¹⁶Ga nagon, zha ne runlay me, nacda porne zha rquiaguiba, o rioxcogaa zho yгаа zhow; sinque laa zho rгааw, porne me rquia zdoo zho. ¹⁷Gotsaa gwi ne ganle zha beenndip me zdoo rey Egipt. Lo Xtiidz me zhobnee zeene rëb me lo rey co: “Ible laa naa bzo luu nac luu rey, luu yguib glu naa poder ne rap naa, zeena dib lo guidzliu guien miech ganle naa nac Dios.”

¹⁸Ga nagon rlu, zha ne gacladz me yquia zdoo me, rquia zdoo me zho; ni scagaa, zha ne gacladz me gunndip me zdoo, runndip me zdoo zho. ¹⁹Nana, no zho gnë: “Telne scaw, ¿pe nac dzigo rlisqui Dios minë run miech, tel mezhäl rnabey zha nac zho tib tib zho?” ²⁰Per nana, ¿cho nac ne par glisqui ne minë run Dios? Zig nac tib guies ben, niacxe zlisquiw lo men ne bzaaw, guiaba: “¿Pe nacne znu bzaa luu naa?” ²¹Led zha ne run dziin co, zrieelo gzaa zho tib guies zigne gacladztaa zho; tib lë ben ne xen zho, zac gzaa zhow tib guies niow, o gzaagaa zhow tib guies beelze.

²²Scaquegaa nagon rzac Dios miech. Grë zha ne psanle me nitlo, ible rap me derech csiaabzhian me zho, glu me poder ne rap me; per laa me bii quiyap zho paciens nieeda gdziñ dze co. ²³⁻²⁴Grëgaa zha ne bzooblo me yгаа lo guielndzon ne no me, zigtaa new ne nac ne zha Israel, zigtagaa zha stib guiedza; ible rap me derech bzooblo me ne, sac rquia zdoo me ne. ²⁵Golsoladz ganle zha bzeet Osé, men ne biadteed xtiidz Dios padzeela. Bzeet me ible zbedz Dios grë zha ne nacd zha Israel ygab zho lo me, zeena gleynie me zho niicle ne rleynied me zho glo. ²⁶Laa stib lugar bzeet Osé, zha bnee Dios lo zho, rëb me: “Ngabde to lo naa, per dzziñ dze ne laa to gac xpëëd naa, ne nac naa Dios nguiamban.”

²⁷Laa Isá stib men ne biadteed xtiidz Dios padzeela, zeene bzeet me zha Israel rëb me: “Niicle ne ndaldoo nac zha Israel pale yuzh ne ndxie ro nisdoo, per zhis zho gac zha ne ycaania Dios; ²⁸sac ziaadyoble gun Dios xquielwxtis me lo guidzliu, zigne bneele me.” ²⁹Min co ga bzeet Isá mazd glo, rëb me: “Telne niaca mine yquiad zdoo Dios zha Israel, znitlo me zho grëse zho zigne bnitlo me zha Sodom ni zha Gomorr.”

Zha ne nacd zha Israel laa zho wbig lo Dios

³⁰Nana guiab ne: ¿Zha nac dzigo ne rcaania Dios zha zit? Laa me rcaania zho niina sac dib zdoo zho rnalo zho me, niicle ne wlaltaa ib bioxcod zho dien zha nsilaa me zho lo dol. ³¹Laa zha Israel, niicle ne rioxco zho run zho grë mine rnabey ley parne csilaa me zho, per ib laad zho lo dol sca. ³²Laad zho, sac zienied guic zho gnalo zho Dios, rzac zho por grë ncuaañe gunse zho laa zho laa lo dol. Mincoxe waa, zeene laa Jesús biaad, bzhaac zho me zig tib quie ne rriel ni ne riab ne liu. ³³Lëë min co ga zhobnee lo Xtiidz Dios, zaatne rnee:

Sxel naa tib men lo zha Israel,
me gac zig tib quie ne griel ni zho;
sangue zha ne dib zdoo gnalo me,
tsod dze ne tso zho guielnë, guiab zho pe nacne bnalo zho me.

10 Bets, bzian, ne nliipaa rzaac naa tebaa zha laa grëse zha Israel lo dol, tibaque rnab naa lo Dios guien zho gbig zho lo me, zeena laa zho lo grë xtol zho.

²Parga nli ran naa noxco zho gbig zho lo me; per rund zho mine no gun zho. ³Ib riend zho zdoo Dios ral rsilaa me miech lo dol, laa zho rzac por mine gun zho laa me csilaa zho. Ib nëd zho gun zho mine racladz Dios. ⁴Sac gon, laa Dios racladz Jesús gnalo zho zeena guiaanmbe zho lo grëse xtol zho; sac Jesússe nac men ne brieelo been grëse mine rnabey ley.

⁵Bzeet Moisés rëb me, zha ne gnalo ley ne lëew csilaa zho, none gun zho grëse mine rnabeya; ⁶sangue zha ne gnalo Jesús ne me csilaa zho, nacda dien peraa gun zho. Nacda ncuaañe tso zho guiab zho, tebaa zha tsie zho lo me gbaa, gnab zho csilaa me zho (ncuaañe gacda ga, dzigo rrieequia racladz zho quiet me ga stib); ⁷o guiaabгаа zho tsie zho zaatne noliu grë ngutoo, tsienab zho lo me csilaa me zho (ncuaañe gacdaque ga, ni stiba led gad no me, laa me brieebanle). ⁸Rquiind paraa tsieguib zho csilaa me zho, zig rzac zho zdoo zho, zig rzac zho ro zho, sca gax lo zho zo me quiambëz me csilaa me zho.

Min co nac mine noseed no miech, rnee no lo zho: ⁹Zha ne cueero guiab zho Jesús nac men ne rnabey lo xquielmban zho, ni dib zdoo zho gliladz zho nli bleeban Dios me, dzigo silaa me zho lo grë xtol zho. ¹⁰Sac none dib zdoo ne gliladz ne, dzigo sanmbe Dios ne lo dol; ni none cueero ne pe nac mine riladz ne, dzigo scania me ne. ¹¹Rnee lo Xtiidz me: “Zha ne dib zdoo gliladz Jesús, quitnied me zho.”

¹²Grëse miech, niicle zha Israela, niiclegaa zha stib guiedza ible sca ycaania me zho, sac led yed me rbe; me rnabey zho grëse zho, ni grëtaa ncuaañe rap

me, zdeed mew lo zha ne gnaba lo me. ¹³Rnee lo Xtiidz me: “Grëse zha ne gnab lo Dios csilaa me zho lo dol, ible silaa me zho.”

¹⁴⁻¹⁵Nana, no zho gnë: ¿Per zha gnab zho lo me, ni runbeyd zho me? Nli gunbeyd zho me, tel niaca mine gard cho cxeel zha ne tsienee Xtiidz me lo zho, parne gon zho cho nac me. Ni min co rzeet Isá, zeene rëb me: “¿Zha wentaa ziaad zha ne ziaadnie Xtiidz Ndzon Dios!”

¹⁶Rgaaz Xtiidz Dios, per led grëd zho rzoobdiaga, zig rbiireque Isá, rnee me: “Dios, bui ganle choot nëd gliladz Xtiidz luu, mine rne naa.” ¹⁷Sac gon, parne dib zdoo ne gnalo ne Dios, ib none yquiaadiag ne Xtiidz me ganle cho nac Jesús.

¹⁸Zig nac zha Israel, ¿niacxe gard gon zho Xtiidz Dios? ¿Binle zhow! Blactaa zha ne ziyadnee Xtiidz me, haxta zaatne mazdraa zita, laa miech quiayacnan Xtiidz me. ¹⁹No hor rne naa: ¿Pe ib riend zha Israel, telne gbigd zho lo me csilaa me zho, laa me csilaa miech stib guiedz? ¿Per rienele zhow! Sac bzeetle Moisésa padzeela, zeene rëb Dios laa me ycaania miech stib guiedz, zha ne ib peet riend; zeena tednë zdoo zha Israel, togo ziaa zho biini. ²⁰Mincoque ga pquiaa Isá, zeene rëb Dios:

Grë miech ne ni zienied guic yguib zho naa, laa zho beenbey naa.

²¹Laa zha Israel, blactaa bzëëb nia naa lo zho ni naa niacnie naa zho,
per pa nion zho xtudz naa, lel gocntseeb zho lo naa.

Zha Israel ne wbig lo Dios

11 Per guiabd ne togo psaanladzle Dios zha Israel. Golgan ganle, zha Israelacxe waa nac naa, zha xtii Benjamín, zha xtii Abraham nac naa; ²dzigo led psaanladzd Dios zho (nac zho zha ne padzeelale bzooblo me ygab lo me).

Golsoladz ganle, zha rëb Dios lo Lí, men ne biadteed xtiidz Dios padzeela, zeene bzodiidznie Lí Dios ³grëtaa ncuane noyun zha Israel, ptsil zho zaatne riegan grë miech me, beet zho grë zha ne pxeel me noteed xtiidz me, ni laa zho quianaalaque gut zho Lí. Rzac Lí guiendraa zha ne ron xtiidz me, ⁴dzigo hor co rëb me lo Lí: “Led tibd luu riaan, no zgadz mil zha ne gard yquitsgzhib lo Baal, naa bzooblo zho ygab zho lo naa.”

⁵Scaquegaa niina nagon, led grëd zha Israel psaanladz Dios, no palal zha ne pquia zdoo me ble me zho ygab zho lo me. ⁶Rne naa pquia zdoo me zho, sac guiabd ne togo por demas wen zho gane ble me zho; sac gon, tel por wen zhow, nlid dzigo ne rquia zdoo me zho.

⁷Znu nagon naca: Zha Israel ne bzooblöle me, zha cose guiaanwen lo me. Laa los demas zho, lel lozh gacndip zdoo zho, ⁸zigne zhobneeque lo Xtiidz me, zaatne rnee: “Beenndip Dios zdoo zho, riend zho zha gbig zho lo me; niicle ne zob lo zho, per rac zho zig rac zha ne rand; niicle zob diag zho, per rac zho zig rac zha ne peet rond. Ni scataque nac zho haxta lo nadze.” ⁹Mincoque bzeet rey David, zeene rëb me:

Lëëque grë zhilni zho, lëëque grë ncuuane row zho, gac zig len doo ne,
len guix ne tsietsobe zho;

zeena yгаа zho guieInë ne rieguial zho.

¹⁰ Guiaan zho zig tib zha ne rold lo,

guiaan zho zig tib zha ne blozh blengw zhits.

Psilaa Dios zha ne nacd zha Israel

¹¹ Grë zha Israel ne sca gocndip zdo, guiabde to togo laa zho bnitlole ga. ¡Lëda! Sinque laa me bdeed diidz sca goc zho, zeena gbig grë zha stib guiedz lo me, csilaa me zho lo xtol zho; ni tednëгаа zdo zho gan zho laa me rcaania zha stib guiedz. ¹² Nana, telne scataa guieInzaac ne bgaa miech stib guiedz ne znu racndip zdo zha Israel, ¿pe lelgue dzigo zeene laa zho gbiire guiaanwen lo Dios stib? ¡Zha naczhe grëraa guieInzaac ne yгаа miech!

¹³ To ne nac to miech stib guiedz, led nanle to ganle, ible Dios bzo naa none naa Xtiidz me lo to. Scagaa naa, dib zdo naa rioxco naa run naaw, ¹⁴ zeena togo soobladz palal zha ladz naa ye zho squi gbig lo Dios csilaa me zho lo xtol zho. ¹⁵ ¡Que talzhe ndzona zeene laa zho gbiire gbig lo Dios stib! Nli laa Dios psaan zho, laa grëгаа miech stib guiedz laa zho biaanwen lo me. Gacxe waa, ¡tib guieIbley nrooba zeene laa me ycaania zha Israel stib! Sac gon, rrieequia grieeban zho ga.

¹⁶ Zigne pcaania Dios xmengol zha Israel bgab zho lo me, scaqueгаа scaania me xpëed zho; sac gon, zig nac tib zhan yag, zeene ndaan low mine naaza len liu, ndaanaque zhicwa. Scaque nagon, zeene bzooblo Dios xmengol zha Israel, yele zho ga bzooblo me.

Nana, gzoob ne nac zha Israel zig tib zhan yag oliv: low nac xmengol zho, laa zho nac zhicwa. ¹⁷ Bdzin dze brug palal zhicwa, dzigo ga bguiid zhicw yag oliv dan; lëë yag oliv dan co nac to ne nac to miech stib guiedz. Sca nac ne laa Dios pcaania to zigne pcaania me xmengol zha Israel; ye to laa to nogaa guieInzaac co. ¹⁸ Lëëraasi, guiabde to togo nonraa to lo zha ne nac zhicwa mine brug ga. Golguien ganle, por lo yag ndaan zhicwa.

¹⁹ Nana, nend guiab to: “Per riogual now, gacxe waa no biaan xlugar zhicwa, mine brug ga.”

²⁰ ¡Golgap cuidad gon! Nli lëë biche zho, laa to biaan xlugar zho, porne bnëd zho nalo zho Dios zigne bien to rnalo to me; per golguien gacniatsde to. ²¹ Golgan ganle, niicxe zha name zhicwpaa yag co nac zho ni ptiche me zho, ¡pelel to dzigo!

²² Golwi ganle zha wentaa Dios, per scagaa rdziladzd me gats xtiidz me. Mincoxe waa gondzed me grë zha co, laa to gon, wen goc me lo to. Lëëraasi none gon to mine rnabey me, sac gon telne gonde tow, scaque gandzed me to.

²³ Nana, zig nac zha Israel ga, telne gbiire gbig zho lo me, ible squiid me zho lo yag co stib. ¡Golgan ganle men nroob nac Dios! ²⁴ Niicxe to na, nac to zig yag oliv dan, pquia zdo me to pquid me to zhicw yag oliv wen co, ¡pelel zha Israel dzigo yquiad zdo me, gbiire yquid me zho lo yag ne nacpaa zho!

Scaania Dios zha Israel ne bzozit lo me ga

²⁵Bets, bzian, laa naa gni lo to ganle zha nac mine no guic Dios gun me. Niicle ne riend miecha niina, per racladz naa gacnan tow, zeena gacniatsde to ne squi bzooblo me to: Nli ndal zha Israel racndip zdoo zozit zho lo me niina, per zeene laa gre miech stib guiedz blozh wbig lo me, ²⁶hor co grese zho, laa zho gbiire gbig lo me stib ycaania me zho. Zigne bzeetle zha ne biadteed xtiidz me, zeene reb zho:

Guiedz Sion, ga grie meñ ne cuee zha Israel lo xquielntseeb zho.

²⁷Dzigo laa Dios csilaa zho lo gretaa xtol zho, zigne psanle me diidz lo zho.

²⁸Len dze rii rlee zha Israel ron zho none gnalo zho Jesus, par laa zho lo dol. Znu rac zho zeena gdeeda diidz gbig to lo Dios, nac to zha stib guiedz; sangue Dios rleynie me zho, sac scale reb me lo gre pxozgol zho. ²⁹Me bzooblo zho, dzigo ible scaania me zho; sac gon, led yed me ctsëë xtiidz. ³⁰⁻³¹Glo, to nac zha ne ib bind xtiidz Dios, laa niinagaa na zha Israel ned gon xtiidz me. Per zigne rquia zdoo me to niina, scaquegaa zdzin dze ne yquia zdoo me zho. ³²Grese miech, zigtaa zha Israela, zigtagaa tow ne nac to miech stib guiedza, laa Dios bneedz diidz sca gocntseeb to lo me, zeena grieelo glu me ganle ne lalga rquia zdoo me ne.

³³¡Gotsaa gwi ganle zha men nroobtaa nac Dios! ¡Pa lotaa rac me, pa lotaa rien me! ¡Pa lotaa rioxco me miech! ¿Cho grieelo guien pe nac mine no guic me gun me, pe nacgaa gun mew? ³⁴Zigne zhobneeque lo Xtiidz me, zaatne rnee: “¡Choot nand pe no guic Dios gun me! ¡Choot grielod guiab lo me, znu znu been! ³⁵Waltaa choot gard pe gdeed lo Dios, par guiab ne laa Dios zëeb.” ³⁶¡Peet gon nzëëbd Dios lo miech! Sac gretaa ncuane no, me psana, me naaza, ni me rnabea.

¡Mese nac men ndzon, tibaque gotsaa dziuunnon ne me! Sca rieguiala.

Golban zigne rdziladz Dios

12 Bets, bzian, laa to gocnanle ganle pa lotaa nquialadz Dios to. Nana sca, dib nase to golsan to ladznia me, gac to zig tib gon mbe, tib gon ne gley me ycaania me. Sca glu to ne nli rleynie to me.

²Ib tsienaldraa to gre ncuane ndzinlid ne noyac lo guidzliu rii, grese zhgab ne paat rquiind, golcueew guic to; zeena gban to zigne racladz me, ni guien to ganle zha wentaaw zeene zienal ne mine rnabe me.

³Ne znu nac naa zha ne pquia zdoo Dios noyun naa dziin rii, nligaa laa naa rso diidz lo to, ndzinli golgac, ib glude to ncuane ni nacde to, sinque golguien cho nac to, zha rnalo to Dios. ⁴⁻⁵Golgan ganle zha niaa xcuerp ne: nzian le niaaw, ni tib tiba nose zaatne rquiina; scaque nagon nac gre zha ne ngab lo Jesus, nzian nac ne, per tib tib ne nose zaatne rquiin ne, tsod zha ne yquiind. Grese ne none gnalolsa ne gre zha ne nacgre ne.

⁶Tib tib ne bneedzse Dios guielbiini lo ne, par grieelo dziuun ne dziin ne pso me ne dziuun ne lo me. Gacxe waa,

zha ne pso me cteed xtiidz me, none gnee zhow zigne csiaab mew guic zho;

⁷zha ne pso me gun ncuuane yquii lo grëraa miech, none gun zhow;

zha ne pso me cseed miech, none min co gun zho;

⁸zha ne pso me gdeedlban miech, none lban gdeed zho;

zha ne pso me ygad, none dib zdoo zho ygad zho;

zha ne pso me so gnabey, none ndzinlise gnabey zho;

zha ne pso me cchoobladz zdoo zha ne mban noded, none nley gac zho tsienee zho lo miech.

⁹Dib zdoo to golleynie samiech to. Gandzede to grë ncuuane ntseeb, niapse ncuuane rquii goltsienal. ¹⁰Ine niowse golleynie grë zha ne nacgrë to, gacnguizhde to, quitniede to zho.

¹¹Nguieel golgac, gacmbechde to, dib zdoo to goltsoxco golgun mine nac tsiin Dios.

¹²Nley golgac lo guielmban rii, golsoladz ganle zha nactaa grë ncuuane no gneedz Dios lo to; golxecw lo grë guielnë ne gan to; tibaque golzodiidznie Dios.

¹³Goltsoxco xliaadz grë zha ne nacgrë to ngab to lo Dios; zaacse golcuëzlo zha ne ziaadted lidz to.

¹⁴Grë zha ne rtsidil to, laa ne gdzibdee to zho, golnab gunlay Dios zho.

¹⁵Zha ne no guielbley, golgacnie zho lo xquielbley zho; zha ne nogaa guielnë, golgacnie zho lo xquielnë zho.

¹⁶Gacniatsde to. Grë zha ne rzac miech peet nond, goltsieelsa zho; guiabde to to nac zha ne racraa. Niowse golbannie zha ne nacgrë to.

¹⁷Zha ne csaci to, gunde to ne yeque to csaci zho. Goltsoxco wen golgac lo grëse miech. ¹⁸Tilniede to samiech to, goltsoxco tibaque wen golbannie zho. ¹⁹Golguien, zha ne csaci to, ib guiabde to ne tozhal ctsire guielnë co, sinque golsana ladznia Dios, metaa nan zha gun me xquielwxtis me; zigne ziaad lo Xtiidz me zeene rëb me: “Naa raguial gun guielwxtis, naa gunquizh miech tel pe nac dol ne zëëb zho. ²⁰Gacxe waa, zha ne rlëë lo luu, zeene gan luu mban rac zho rcaabedz zho, mazd bdeed ncuuane gow zho; gangaa luu mban rac zho rnab zhis zho, bdeed ncuuane guie zho. Sac zeene sca gun luu, stoladz zho csoladz zho mine been zho luu; rrieequia gui ga cuib guic zho.”

²¹Golguien sca, niapse guielwen goltsienal, zeena sca ycuëëz to lo guielntseeb. Gdeete to diidz ne ye to gun guielntseeb.

Golgon mine rnabey wxtis

13 Grëse to none gon to xtiidz zha ne nacpaa wxtis. Sac grëse zha ne nac wxtis, ible Dios rdeed diidz ne laa zho rac dziin co. ²Gacxe waa, zha ne racndaan lo wxtis, rrieequia ye lo Dios ga racndaan zho; ni zha ne racndaan, lëëque zha rguib ted zho caxtigw ga. ³Golgan ganle, ible laa wxtis zo, par zha cobey caxtigw ne tsieguial zha ntseeb. Telne racladzde to sca

tsoxtseeb to lo wxtis, zaacse golgac; scagaa zha, tsod pe nacne ygaal zho to. ⁴Dios psan rzo zho ni zha rteedlo to, ni scagaa, telne pe guielntseeb ne gun to, zhaque gnabey pe caxtigw ne yгаа to; sac gon, ible laa Dios bzo zho gun zho guielwxtis. ⁵Gacxe waa, ib none gon to mine rnabey zho, zeena tsoxtseebde to lo zho, ni scagaa niicle nez lo Diosa ine tiblise no guic to.

⁶Scaque dimi ne no gdeed to lo zho, goldeeda; sac rquiin dimi co parne grieelo gun zho tel pe nac dziin ne no gun zho. ⁷Golguien sca, dimi ne no gdeed to lo zho, goldeeda; mine rnabey zho to gun to, golguna. Golleynie zho, quitniede to zho, golguien zha non nac zho.

Golleynie samiech to

⁸Grë ncuane riegual to gun to, golgungazha zeena bdedgaw; sangue samiech to, none tibaque gleynie to zho. Zha ne rleynie samiech, grele mine zhobnee lo Xley Dios ga quiayun zho. ⁹Sac telne rleynie to samiech to zigne rleynie to to, nod pe nacne csacsi to zho; guiab to:

laa to yquidie zho,

laa to gut zho,

laa to cuan zho,

laa to tsonie tsieel zho,

gzoobladzгаа to gre ncuane quianie zho.

Gacxe waa, zha ne rleynie samiech zigne rleynie zho zho, grele mine zhobnee lo Xley Dios ga quiayun zho. ¹⁰Zha ne rleynie samiech, rsacsidraa zho zho; ni min co rnabey Dios. Gacxe waa, grese ne none gleynie ne samiech ne.

¹¹Ib none gban ne zigne racladz Dios, golle na tsaa ne biini; sac gon, laa dze ne ycaania Dios ne bii ziaadgaxraa, ledle zeene psilo rnalo ne me. ¹²Dziuun ne cuent laa guieel lozhle ted, laa biini ne guini liu dze ndzon co ziaadle; gacxe waa, ni lalnu guionald ne mine racladz mendox, sinque mine racladz Dios, min co golgotsaa dziuun ne. ¹³None ndzinli gban ne:

dziuund ne guielgonziu,

dziuund ne gre lni yozh,

yquiangobd ne zha ne led tsieeld ne,

dziuund ne gre guielyozh ne racladz xcuerp ne,

dilnied ne samiech,

glëenied ne zho zeene stib noded zho.

¹⁴Golgotsaa gnab ne lo Jesús sca, zig zie dze lozh csanmbe me xquielrien ne, csanmbe me zdoo ne, gac ne zigne racladz me. Dziuundraa ne gre ncuane ndzinlid ne racladz xcuerp ne.

Gzeed zdoo to mine run zha ne nacgre to

14 Golcaania zha ne gard tsoguicpaa zha nac Xtiidz Dios. Telne no palal mine riladz to zhaa rzac zho, glisquide tow lo zho. ²Gzoob ne, no to rzac peet nacda gow to gre lose guielwagw, laa zha ne na gard tsoguicpaa Xtiidz Dios, rzacгаа wena telne scuaan guizhyese gow zho; ³ga nagon, ni stib

ni stib nod pe nacne glisqui dien cho pe row, dien cho pe rowdga; sac gon grëse to, Dios bzooblo to ngab to lo me. ⁴Nana zig nac zho, lo Dios ngab zho, led lode tow; ¿cho nac to dzigo tso to glisqui to dien pe run zho? Dios nac men ne nan telne lëew o lëdgaaw ga quiayun zho; men nroob nac Dios, me gedeed guielbiini lo zho guien zho gban zho zigne racladz me.

⁵Scaque, no zho zienal dien pa dzepaa none gleynie zho Dios, nogaa zho rnee zac tel pa dzetaa gleynie zho me. Per peet nacd ga, zac tib tib zho gunse zho mine rzac zho rdziladz me. ⁶Tel pa dzetaa wena, totsaque run zhow par gunnon zho me. Scaquegaa guielwagw, wena zha ne gow grëlosew; niicle zha ne ncuuegaa ncuane gow, wenaquew, totsaque run zhow par glu zho ne rleynie zho me, ni rdeed zho xquizh lo me.

⁷⁻⁸Sca nagon naca, per led min cod dzieets ne dziuun ne mine gacladztaa ne. Grëse ne ne nac ne zha ne ngab lo Dios, laa ne mban par dziuun ne mine rnabey Jesús, ni zeene guetgaa ne, lo me none gdzin ne. Gacxe waa, niicle niina ne zomban new, niicle zeene gutlegaa new, ladznia me no ne. ⁹Sac gon, tel Jesús gut me ni brieegan me; gacxe waa, me rnabey ne grëse ne, zigtaa zha mbana, zigtagaa zha guta.

¹⁰Jesús rnabey ne tib tib ne. Gacxe waa, nonguielda glisqui to lo zha ne rund mine run to; nonguielda por mincose sac to zho zig zha ne peet nond, tso to gnedraa to lo zho. Ni stiba, gal dze ne laa Dios gun guielwxtis, grëse ne laa ne none gacredz lo me. ¹¹Zigne raquietaque lo Xtiidz me, zaatne rnee me:

Naa nac Dios mban, gneli naa lo to ganle:
grëse miech, ible squitsgzhib zho lo naa,
cueero zho ne nli naa nac Dios.

¹²Sca nagon gaca, tib tib ne ib laa ne no cueero lo me tel zha wban ne.

Csañde to zdoo zha ne nacgrë to

¹³Nana sca, zha ne sca rund grë mine run to, ible glisquidraa tow lo zho. Golguien, gunde to ncuane rgobey to yquiaaqui gunctal zho xtol zho, o csaangaa zho Xtiidz Dios. ¹⁴Tel naa, nappaa naa led dolda gow ne grë lose guielwagw; sac niicle Jesús scaque nac xtiidz me. Sanguie zha ne rzac dola, mazd gowd zhow; sac tel laa zho gowa, xtol zho ga gunctal zho. ¹⁵Zig rne naa ga, led dolda, per telne xtiinpa row to tib ncuane rquiaqui rsan to zdoo stib zho, ga rlu to ne rleyniede to zho. ¡Golguien sca, gowde to ncuane yquiaaqui sozit zho lo Dios! Sac gon, blactaa guienë ne bded Jesús psilaa me zho.

¹⁶Ib gunde to grë ncuane yquiaaqui gneenë miech to, niicle ne nappaa to led dolda. ¹⁷Zha ne ngab lo Dios, mine none tsienie guic zho nac ne ndzinli gban zho, tilnied zho samiech zho, ine nley gac zho (min co nac mine rdeed Espíritu Sant); led tsod zho dien pe zac gow zho, pe zac guie zho, pegaa gacda. ¹⁸Sca rdziladz Jesús, ni zha ne sca gban, zleynie Dios zho, niiclegaa grë miecha zleynie zho zho.

¹⁹Goltsoxco sca, gunde to ncuane codil to grë zha ne nacgrë to; zeena tipse gac to lozh tsoguc to zha racladz Dios gban to. ²⁰Ib gunde to, ne por

tib guielwagw codil to grè zha ne ngable lo Dios. Zig rnele naa ga, grèlose guielwagw mbew, peet nacda gow new; sinque mine nonguielda, nacne gow ne mine nanpaa ne yquiaaqui csañ ne zdoo stib zho. ²¹Minccocxe waa, mazd gowde to pe scuaan bëël, guiede to nziu, telne min co yquiaaqui gunctal to xtol zho; ni tel pe grèraa ncuaañe nan to tsod zdoo zho, gunde tow.

²²Niicle ncuaañe nanpaa to dolđa gun tow, niiclegaa nöz lo Diosa led dolđa; per mazd gunde tow zeene zo zha ne rzac dolđa. ¡Wen zie zha ne sca niicle nanpaa zho dolđ nac mine gun zho, per rund zhow, parne gunctald zho xtol zho!

²³Sanguè zha ne racchop guic riend zho dien pe zow zho tib guielwagw, ni lozh ga row zhow, runctal zho xtol zho ga; sac beend zho mine rzac zho rdziladz Dios. Grèse ncuaañe rzactaa zho wend ni gun zhow, xtol zho ga gunctal zho.

Golgacnie zha ne nacgrè to

15 ¹⁻²Golguien sca, to ne nac to zha ne dziitsle zo lo Xtiidz Dios, golgacnie grè zha ne gard sodziits lo Xtiidz me. Golgun ncuaañe tso zdoo zho, ncuaañe yquiin lo zho, zeena lozh guien zho zha gnalo zho Dios; led tsode to gun to ncuaañe yquiinse lo to.

³Golgan ganle, niicle Jesúsa bguibd me niac ncuaañe nquiin lo me. Zigne raquetaque lo Xtiidz Dios, zaatne rnee: “Grètaa diidznè ne rnee zha ne rlèè lo Dios, grèsew pcon zho me.”

⁴Grèse mine raquiet lo Xtiidz Dios, padzeela pquiaw; ni ib laaw pquia zeena gacndion ne zha no gban ne. Lèew rnee none nley gac ne, lèew rnee guieete ne yquiambiaaz ne yгаа ne grè mine bzeetle Dios. ⁵Dios men ne rneedz guielebley co, men ne racnien ne guieete ne, me gacnien to niowse gbannie to grè zha ne nacgrè to. Golleynie zho zigne rleynie Jesús to, ⁶zeena grèse ne tipse gac ne dzioolnie ne Dios, Pxož Jesús, men ndzon ne rnabey ne.

Grèse miech noyon Xtiidz Ndzon Jesús

⁷Golguien sca, grèse zha ne nacgrè to, golcaania zho zigne pcaania Jesús to. Sca golgun, zeena xoobnenraa lè Dios.

⁸Golsoladz ganle, zeene biaad Jesús nroob ncuaañe been me lo zha Israel, me biaadgun grètaa mine bzeetle Dios padzeela. Ga blu Jesús grèse mine rnee Dios, ib run mew. ⁹Ni golsoladz ganle, ye grè miech stib guiedz biaadsilaa me, gane niina grèse zho roolnie Dios, ne scataa pquia zdoo me zho. Min co raquiet lo Xtiidz me, zaatne rnee:

Zoolnie naa luu,

ni zlu naa lo grè zha stib guiedz ne men non nac luu.

¹⁰Stib lugar rnee:

To ne nac to miech stib guiedz,

¡ine nley golgac grè to zha Israel!

¹¹Ni no stib zaatne rnee:

Grèse to ne nac to miech stib guiedz,

¡golleynie Dios! ¡Golsannziuu lè me!

¹²Mincoque ga bzeet Isá, zeene znu pquiaa me:

Zrieequia tib men lo xtii Isái;
men co gnabey lo grëse miech stib guiedz,
ni me gnalo zho grëse zho.

¹³Mincoxe waa, to ne nac to miech stib guiedz, rnab naa lo Dios (men ne psanle diidz pe nac grë ncuaañe ygaa ne ga) gneedz me guielbley lo to, gacnie me to peet zhgab ctsebde to niina ne laa to riladzle me. Rnab naa lo me, gacniën Espíritu Sant to, ine gley to yquiambëz to gac grë mine psanle me diidz ga.

¹⁴Bets, bzian, nanle naa zha wen nac to, nacde to zha ne csan zdoo stib zho; rienle to zha racladz Dios gban to, rienle to zha cso to diidz lo grë zha ne nacgrë to; ¹⁵per lo guits rii gon nzian ncuaañe rso naa diidz lo to. Guiabde to togo ndox naa lo to, sinque laaw ben naa zeena guiaañladzde tow. ¹⁶Ne nquialadz Dios naa, laa me bzooblo naa noyun naa xtsiin Jesús, none naa Xtiidz Ndzon me lo grë miech stib guiedz, zeena csanmbe Espíritu Sant zho; lozh ga gded naa zho lo Dios zig tib gon ne gley me ycaania me.

¹⁷Gacxe waa, tel niina rley naa, sac noyacniën Jesús naa noyun naa dziin ne pso Dios naa. ¹⁸Me noyacniën naa none naa Xtiidz me lo grë zha stib guiedz, zeena gban zho zigne racladz me. Ni laa zho nobig lo me, sac ran zho grëse mine rne naa mban naaw zigne naca, ¹⁹ni ran zho zha racniën Espíritu Sant naa run naa grë milagr, grë ncuaañe rzee zdoo zho. Sca nagon none naa Xtiidz Jesús lo zho, brie naa Jerusalén briequia naa haxta nëz xtan zha Ilir. Guiabde to togo rtix naa diidz. ²⁰Ni laa naa noxco za naa zaatne waltaa gard gon zho cho nac Jesús, zeena gasëëbd naa zaatne ziyele zha ne güeynee Xtiidz me. ²¹Laa naa zana zigne zhobnee lo Xtiidz Dios, zaatne rnee: “Grë zha ne waltaa gard gon cho nac me, zeene gan zho grëtaa ncuaañe run me, laa zho gunbey me.”

Racladz Pabl tsie Pabl Roma

²²Nzian vuelte gocladz naa nialgan naa to, per ib bdeetew diidz, sac laa naa bia grë dan co biaseed naa miech. ²³Izle ga na tibaque sca no guic naa, laa niina ne laa naa psiaal lo xtsin naa, nataa nagon ible zial naa. ²⁴Laa naa no ga Spañ, dzigo lëë nëzle ga teed naa Roma i guialgan naa to. Tib guielbleya lo naa guialquiabdiuuzh naa to, dzigo lozh ga siguiel to gon to xyudar naa grieelo ga naa nëz Spañ.

²⁵Laa niina, laa naa no ga Jerusalén gasan naa tib gon lo grë zha bets, zha bzian ne no ga; ²⁶sac grë zha bets, zha bzian, ne no nëz Macedon, ni nëz Acay, laa zho bnediidz beenlo zho palal dimi cxeel zho yquiin grë zha prob ne no nëz co. ²⁷Niapse zdoo zho gol ptop zho gon co, sac rzac zdoo zho grëtaa mine been zha Jerusalén lo zho; sac gon, zha co güeynee Xtiidz Ndzon Jesús lo zho. Laa niina, laa zho rxeel palal ncuaañe rgaa lo zho yquiin zha Jerusalén.

²⁸Zigne lozh nagon gasan naa gon co Jerusalén, dzigo laa naa teed guialgan naa to i zigne nile naa ga. ²⁹Rien naa nroob guielnzaac ne gneedz Dios lo to zeene laa naa guial.

³⁰Bets, bzian, golguien ganle Jesús rnabey ne grè ne; ni rleynie ne zha ne nacgrè ne, sac Espíritu Sant nacnie ne. Gane niina, laa naa rnab lo to, golgotsaa gnab ne lo Dios gacniën me naa; ³¹golnab lo me, csilaa me naa ladznia grè zha Israel ne gard guien cho nac Jesús. Goinab lo me, ine gley grè zha bets ne, zha bzian ne, ycaania zho gon ne gasan naa lo zho nu; ³²zeena ine nley no zdoo naa glanso naa lo to, ine gdziiladz naa len dze ne cuèz naa lo to i. Sca nagon no guic naa, totsaque gneedz Dios diidz gaca. ³³Ni me ne nac me men ne rbee miech lo grèse zhgab, lo grèse guielxtseeb, me gacniën to. Sca gaca.

Bdiuzh

16 Bets, bzian, len dze rii laa Feb, tib wnaa ne run xtsiin Dios guiedz Cencré, laa me guiaad nèz lo to i. ²Laa naa rso diidz lo to, zeene glanso me i niowse golcaania me, golcaania me zigne rieguial ycaania ne zha ne ngab lo Dios. Golsiguiel goldeed grè ncuane yquiin me; sac gon, tel me ndal grè zha ne ziyacnie me lo xliaadz zho, haxta naa blactaa ziyacnie me naa.

³Ni rnab naa lo to, golsiguiel goldeed zhibdiuzh naa lo grè zha qui.

Goldeed tib zhibdiuzh naa lo Aquil i, grop tsiel me Priscil. Blactaa ziyacnie zho naa zidziuun no xtsiin Jesús, ⁴haxta bdedlaa zho niet zho psilaa zho naa lo guielgut. Rzadox zdoo naa mine been zho ga, niicle grèragaa zha zit ne nacgrè new, rzac zdoo zhow.

⁵Ni scagaa, grè zha ne rcaalsa lidz zho riegoalnie Dios, goldeed zhibdiuzh naa lo zho. Goldeed zhibdiuzh naa lo Epenet, rley naa rsoladz naa me; lèe me nac zha Asia ne glopaa bzèëb xnèz Jesús.

⁶Goldeed zhibdiuzh naa lo Marí, blactaa noyun me xtsiin Jesús lo to.

⁷Goldeed zhibdiuzh naa lo Andrónic, lo Junias, grop menladz naa zha ne no i; gzapaa no zho bdzio ladzguiib. Glo zho bliladz Jesús lo naa, zha nziuu nac zho lo grè zha ne pxeel Dios nonee Xtiidz me.

⁸Goldeed zhibdiuzh naa lo Ampliat, lèe stib zha ne rdzieel xtidz naa ga; ⁹lo Urban, rsoladz naa me, tipse bdziuu no xtsiin Jesús grop no; lo Staquis, stib zha ne nziuu lo naa, goldeed zhibdiuzh naa lo zho; ¹⁰lo Apel, ye me blactaa ncuane bded me blu me ganle ne nli dib zdoo me rnalo me Jesús; lo grè zha ne no lidz Ristob ne.

¹¹Goldeed zhibdiuzh naa lo Herodion, ye me menladz naa nac me; lo grè zha ne no lidz Narcis, zha ne riladzle Jesús; ¹²lo Trifen, lo Trifós, ni lo Pérsida, gza men wnaa rii blactaa noyun zho xtsiin Jesús.

¹³Goldeed zhibdiuzh naa lo Ruf, zèëb xtiidz me lo grè zha ne nacgrè ne; goldeed zhibdiuzh naa lo xniaa me ne, run naa cuent lèe stib xnia naa ga, blactaa pteedlo me naa. ¹⁴Goldeed zhibdiuzh naa lo Asintric, lo Flegon, lo Hermes, lo Patrob, lo Hermas ni lo grèragaa zha bets ne nacgrè zho.

¹⁵ Goldeed zhibdiuzh naa lo Filólogo, lo Jul, lo Nerew grop bzian me, lo Olimp ni lo grëraa zha bets ne nacgrë zho.

¹⁶ Grëse to bets, grëse to bzian, golcaania zhibdiuzh naa. Grëse zha ne riladz Jesús nêz rii, laa zho rxeel bdiuzh lo to.

¹⁷ Nu ne laa naa csiaalle lo guits rii, laa naa rso diidz lo to, nsin golso lo grë zha ne ziaad loxaque dien zha codil zho to, dien zha gunğüet zho to, rlu zho mine ni nacdraa Xtiidz Jesús; yquiaadiagde to zhiwseed zho.

¹⁸ Grë zha co, led xtsiindraa Jesús ga run zho, sinque laa zho noxco ncuaañe gdeed guxt xcuerp zho. Diidz nex, diidz ndooladz rnee zho; grë miech ne beelze pe riladz, znuse rquidie zho zho. ¹⁹ Sangue to, zëëb diidz ne ib rsaande to mine nac Xtiidz Dios, zienal to mine rnabey me.

Rley naa ron naa squitaa nguzobdiidz to. Racladz naa tibaque squi niini gac to, zeena guien to niapse ncuaañe yquiin gun to, ni lalnu tsoode to lo guielntseeb. ²⁰ Scagaa Dios men ne rtiche grëse zhgab, grëse dzeb, merle quixdze me Satanás, zeena peet grieelodraa gun ma. Jesús, men ndzon ne rnabey ne, me gacnien to.

²¹ Golcaania zhibdiuzh Timoté, men ne quianie naa xtsiin Jesús, laa me rxeel bdiuzh lo to; scaque zha ladz naa Lus, Jasón ni Sosípater, laa zho rxeel bdiuzh lo to.

²² (Naa nac Ters, naa noquia guits rii, ye naa laa naa rxel zhibdiuzh naa lo to i. Rleynie naa to, sac ye to ngab lo Jesús. ²³ Golcaania zhibdiuzh Gay, men ne rbëz naa lidz, laa me rxeel bdiuzh lo to. Lidz me nu rcaalsa grë zha ne riladz Jesús nêz rii. Ye Rast, men ne nac wxtis quianap xtimi guiedz rii, ni bets ne Quart, laa zho rxeel bdiuzh lo to. ²⁴ Jesús men ne rnabey ne, me gacnien to grëse to. Sca gaca.)

²⁵ Laa naa rsan to ladznia Dios, me gacnien to lozh sodziits to lo Xtiidz me, mine none naa lo miech. Haxta zeene gard tsaa guidzliu, znu no guic Dios csilaa me grë miech lo xtol zho, per choot gocnanda, naraa laaw bzhoobnen.

²⁶ Laa niina, nzian zaatne nogaaz Xtiidz me, zeena grëse zho guien Jesús none gnalo zho, ni mine rnabey me min co no gun zho. Grë zha ne biadteed xtiidz Dios padzeela, bzeetle zho ne znu gaca, ni ible Dios rnabey ne znu gaca.

²⁷ ¡Mese nac Dios, mese nac men ne nlipaa rien! ¡Tibaque sca golgotsaa dziuunnon ne me, grëse ne ne nac ne zha ne ngab lo Jesús! Sca rieguiála. Pabl